

BOSNA I HERCEGOVINA
CENTRALNA IZBORNA KOMISIJA
SREDIŠNJE IZBORNO POVJERENSTVO



БОСНА И ХЕРЦЕГОВИНА
ЦЕНТРАЛНА ИЗБОРНА КОМИСИЈА

P R A V I L N I K
o vođenju Centralnog biračkog spiska

Sarajevo, april 2010. godine

Na osnovu člana 2.9. stav (1) tačka 2., a u skladu s Poglavljem 3. Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08 i 32/10), Centralna izborna komisija Bosne i Hercegovine je na 15. sjednici, održanoj 29.04.2010. godine, d o n i j e l a

P R A V I L N I K **o vođenju Centralnog biračkog spiska**

POGLAVLJE I. (UVODNE NAPOMENE)

Član 1. **(Primjena)**

Ovim pravilnikom utvrđuju se: sadržaj, način upisa birača u Centralni birački spisak, rokovi i način zaključivanja i potvrđivanja konačnog Centralnog biračkog spiska, rokovi za dostavljanje podataka o promjenama u evidenciji raseljenih lica i evidenciji državljana koji glasaju van Bosne i Hercegovine, te način, forma, sadržaj i postupak izrade izvoda iz Centralnog biračkog spiska, forma obrazaca i nadležnosti centra za birački spisak (u daljnjem tekstu: centar).

Član 2. **(Definicije)**

Pojedini izrazi upotrijebljeni u ovom pravilniku imaju sljedeća značenja:

- a) „Centralni birački spisak“ je evidencija državljana Bosne i Hercegovine koji imaju biračko pravo u skladu s Izbornim zakonom BiH i formira se, vodi za potrebe organizacije i provođenje izbora u skladu sa zakonom, za provođenje referendum, za provođenje opoziva izabranog funkcionera i izbore organa lokalne samouprave u skladu sa zakonom.
- b) „Redovan birač“ podrazumijeva državljanina BiH koji ima prijavljeno prebivalište u općini u kojoj se nastanio s namjerom da tu stalno živi i gdje je prijava prebivališta izvršena u skladu sa Zakonom o prebivalištu i boravištu državljana BiH, a koji svoje biračko pravo ostvaruje na redovnom biračkom mjestu.
- c) „Birač koji glasa u odsustvu“ je raseljeno lice koje je izrazilo svoju biračku opciju za glasanje u općini prebivališta prema posljednjem provedenom popisu stanovništva u Bosne i Hercegovini.
- d) „Raseljeno lice“ podrazumijeva državljanina Bosne i Hercegovine kojem je status raseljenog lica utvrdio nadležni organ uprave za pitanja raseljenih lica u skladu sa zakonom.
- e) „Izbjeglo lice“ podrazumijeva državljanina Bosne i Hercegovine koji ima biračko pravo i boravi u inozemstvu sa statusom izbjeglog lica iz BiH.

Član 3. **(Pojam)**

(1) Centralni birački spisak za teritoriju BiH sačinjava i vodi Centralna izborna komisija Bosne i Hercegovine (u daljnjem tekstu: Centralna izborna komisija BiH) u skladu s Poglavljem 3. Izbornog zakona Bosne i Hercegovine (u daljnjem tekstu: Izborni zakon BiH) .

(2) Centralna izborna komisija BiH i Agencija za identifikacione dokumente, evidenciju i razmjenu podataka BiH, u skladu s članom 3.4. stav (3) Izbornog zakona BiH, posebnim aktom utvrđuju metodologiju i program pristupa, obrade i pribavljanja podataka za potrebe vođenja Centralnog biračkog spiska.

(3) U vođenju Centralnog biračkog spiska Centralna izborna komisija BiH primjenjuje mjere zaštite, utvrđene zakonima i podzakonskim aktima Centralne izborne komisije BiH.

(4) Centralna izborna komisija BiH će posebnom odlukom odrediti lice odgovorno za čuvanje, upotrebu i raspolaganje podacima Centralnog biračkog spiska koje dostavi Agencija za identifikacione dokumente, evidenciju i razmjenu podataka BiH.

Član 4.

(Sadržaj evidencije Centralnog biračkog spiska)

(1) Evidencija Centralnog biračkog spiska sadrži sljedeće podatke o biračima:

- a) prezime i ime i ime jednog roditelja;
- b) datum rođenja;
- c) jedinstveni matični broj;
- d) spol;
- e) naziv općine u kojoj birač ima prebivalište;
- f) adresu prebivališta (ulica, kućni broj i mjesto);
- g) naziv općine, odnosno izborne jedinice, za koju lice ima pravo glasa;
- h) biračku opciju;
- i) biračko mjesto;
- j) datum prijave prebivališta ili boravišta i
- k) rubriku "napomena".

Član 5.

(Rokovi za zaključivanje i potvrđivanje Centralnog biračkog spiska)

(1) Centralna izborna komisija BiH za potrebe provođenja izbora u skladu s članom 3.6 stav (2) tačka e) Izbornog zakona BiH zaključuje i potvrđuje Centralni birački spisak sa stanjem na sljedeće dane:

- a) dan prije raspisivanja izbora sa stanjem u 24.00 sata;
- b) za birače koji privremeno borave u inozemstvu, izbjegla lica i raseljena lica 75 dana prije dana održavanja izbora u 24.00 sata;
- c) za redovne birače 45 dana prije dana održavanja izbora u 24.00 sata
- d) na dan održavanja izbora u 24.00 sata.

(2) Sve promjene koje su nastale nakon roka utvrđenog u stavu (1) ovog člana neće biti sadržane u zaključenom i potvrđenom Centralnom biračkom spisku.

(3) Odluka o utvrđivanju i zaključivanju Centralnog biračkog spiska sadrži datum, ukupni broj upisanih birača po izbornim jedinicama, a objavljuje se u službenim glasilima.

(4) Sastavni dio odluke iz stava (3) ovog člana je Centralni birački spisak u odgovarajućem elektronskom obliku u jednom primjerku koji se posebno pečati, ovjerava i čuva s ovom odlukom i ne objavljuje se u službenim glasilima.

(5) Centralna izborna komisija BiH može posebnim uputstvom utvrditi kraće rokove za zaključivanje i potvrđivanje Centralnog biračkog spiska u slučaju provođenja prijevremenih izbora.

POGLAVLJE II. (UPIS BIRAČA U CENTRALNI BIRAČKI SPISAK)

Odjeljak A. (Opće odredbe)

Član 6.

(Državljeni BiH koji se upisuju u Centralni birački spisak)

(1) U Centralni birački spisak upisuju se državljani Bosne i Hercegovine s navršениh 18 godina ili koji će do dana održavanja izbora navršiti 18 godina, a koji imaju prijavljeno prebivalište u Bosni i Hercegovini u skladu sa zakonom.

(2) Prema načinu postupka upisa birača u Centralni birački spisak razlikujemo upis:

- a) redovnog birača i
- b) izbjeglog lica.

(3) Izuzetno od odredbi stava (1) ovog člana, u Centralni birački spisak ne upisuje se lice kojem je u skladu s odredbama čl. 1.6, 1.7 i 1.7a Izbornog zakona BiH oduzeto pasivno biračko pravo, kao ni lice koje je pravosnažnom odlukom nadležnog organa lišeno potpune poslovne sposobnosti.

(4) U slučaju kada je u Centralni birački spisak upisano lice iz stava (3) ovog člana ili su nastali razlozi kojima se oduzima pasivno biračko pravo, takvo lice bit će brisano iz Centralnog biračkog spiska na način utvrđen u članu 45. ovog pravilnika.

Odjeljak B. (Upis redovnog birača u Centralni birački spisak)

Član 7.

(Način upisa redovnih birača)

(1) Upis redovnog birača u Centralni birački spisak vrši se automatski na osnovu evidencija o prebivalištu i boravištu koje vodi nadležni organ.

(2) Ažuriranje podataka o redovnim biračima u Centralnom biračkom spisku vrši Agencija za identifikacione dokumente, evidenciju i razmjenu podataka BiH upotrebom jedinstvenog kompjuterskog programa.

(3) Promjene koje utječu na ažurnost Centralnog biračkog spiska nadležni organ dostavlja Centralnoj izbornoj komisiji BiH u pisanoj formi najkasnije u roku od sedam dana od dana kada je promjena nastala.

(4) Nadležni organ koji vodi evidenciju o promjenama prebivališta i boravišta vrši provjeru tačnosti podataka o promjeni prebivališta i boravišta, o čemu se sačinjava službeni izvještaj.

(5) Za tačnost i ažurnost podataka za izradu Centralnog biračkog spiska za redovne birače odgovoran je nadležni organ.

Odjeljak C. (Upis birača u Centralni birački spisak koji ima status izbjeglog lica)

Član 8. (Državljanin BiH koji ima status izbjeglog lica)

(1) Državljanin BiH koji ima biračko pravo i boravi u inozemstvu sa statusom izbjeglog lica iz BiH upisuje se na osnovu dostavljene prijave u Centralni birački spisak za glasanje izvan BiH s pravom glasa za osnovnu izbornu jedinicu, odnosno općinu koja odgovara općini prebivališta s posljednjeg popisa stanovništva u BiH iz 1991. godine ili za neku drugu osnovnu izbornu jedinicu, odnosno općinu, ako može predočiti dokaz o promjeni prebivališta za tu općinu u skladu sa zakonom, u periodu od popisa stanovništva 1991. godine do trenutka stjecanja statusa izbjeglog lica iz BiH.

(2) Uz ispunjen obrazac prijave, podnosilac prijave iz stava (1) ovog člana prilaže i dokaz o identitetu, dokaz o državljanstvu, te dokaze o prebivalištu u BiH iz perioda popisa stanovništva 1991. godine ili od popisa 1991. godine do trenutka stjecanja statusa izbjeglog lica iz BiH. Ukoliko se izbjeglo lice iz BiH ne nalazi u evidenciji nadležnog državnog organa iz člana 3.5 stav (3) Izbornog zakona BiH, odnosno nije upisano u Centralni birački spisak, dužno je dostaviti i dokaz o državljanstvu BiH kako bi bilo upisano u izvod iz Centralnog biračkog spiska za glasanje izvan BiH i time ostvarilo biračko pravo.

(3) Kao valjan dokaz o identitetu podnosilac prijave iz stava (1) ovog člana prilaže kopiju jednog od važećih dokumenata:

- a) lične karte;
- b) pasoša;
- c) vozačke dozvole;
- d) važeće lične isprave izdate od zemlje domaćina ili
- e) izbjegličkog kartona izdatog od vlade zemlje domaćina ili druge međunarodne organizacije.

(4) Kao valjan dokaz o državljanstvu BiH podnosilac prijave iz stava (1) ovog člana prilaže kopiju jednog od sljedećih važećih dokumenata:

- a) pasoša BiH ili
- b) uvjerenja o državljanstvu BiH.

(5) Kao valjan dokaz o prebivalištu u BiH podnosilac prijave iz stava (1) ovog člana prilaže kopiju jednog od sljedećih dokumenata:

- a) potvrde o prebivalištu u BiH iz perioda popisa 1991. godine ili iz perioda od popisa do stjecanja statusa izbjeglog lica ili
- b) lične karte BiH (kopija u cijelosti) iz perioda popisa 1991. godine ili iz perioda od popisa do stjecanja statusa izbjeglog lica.

(6) Ukoliko podnosilac prijave iz stava (1) ovog člana ne dostavi dokaze o prebivalištu u BiH iz stava (5) ovog člana, upisat će se u Centralni birački spisak za glasanje izvan BiH ukoliko se nalazi u popisu stanovništva iz 1991. godine u skladu s odredbama člana 20.8 Izbornog zakona BiH.

(7) Ukoliko podnosilac prijave iz stava (1) ovog člana nije dostavio dokaz o prebivalištu u BiH, niti se nalazi u popisu stanovništva iz 1991. godine, upisat će se u izvod iz Centralnog biračkog spiska za glasanje izvan BiH s pravom glasa za osnovnu izbornu jedinicu u kojoj ima prijavljeno prebivalište prema podacima kojima raspolaže državni organ iz člana 3.5. stav (3) Izbornog zakona BiH, a dalje će se tretirati kao državljanin BiH koji privremeno živi u inozemstvu.

(8) Državljanin BiH koji ima biračko pravo iz stava (1) ovog člana, a podnosi prijavu za upis u Centralni birački spisak za osnovnu izbornu jednicu Brčko Distrikt BiH da bi imao pravo glasa za organe navedene u članu 18.2 Izbornog zakona BiH, mora u prijavi naznačiti biračku opciju entiteta.

(9) Ukoliko državljani BiH iz stava (1) ovog člana u prijavi ne označi biračku opciju entiteta, bit će upisan u Centralni birački spisak, ali neće moći glasati za organe navedene u članu 18.2 Izbornog zakona BiH.

Član 9. **(Rokovi za upis)**

(1) Upis u Centralni birački spisak državljanina BiH koji imaju status izbjeglog lica, a koji imaju biračko pravo, kontinuiran je proces koji se vrši tokom cijele godine u skladu s članom 3.15 stav (9) Izbornog zakona BiH.

(2) Da bi se državljani BiH - izbjeglo lice nalazio na izvodu iz Centralnog biračkog spiska za glasanje izvan BiH za predstojeće izbore, potrebno je da prijava bude dostavljena u roku utvrđenom u članu 5. stav (1) tačka b).

(3) Ukoliko prijava državljanina BiH iz stava (1) ovog člana ne bude dostavljena u roku iz člana 5. stav (1) tačka b) ovog pravilnika, državljani BiH će se nalaziti na izvodu iz Centralnog biračkog spiska za glasanje na odgovarajućem biračkom mjestu u osnovnoj izornoj jedinici u kojoj ima prijavljeno prebivalište u skladu s članom 20.8 Izbornog zakona BiH.

Član 10. **(Način podnošenja prijave)**

(1) Prijave se dostavljaju Centralnoj izornoj komisiji BiH putem pošte, faksa ili elektronski, putem e-maila, prema uputstvu sadržanom na obrascu prijave.

(2) Uz obrasce iz stava (1) ovog člana, tražena dokumentacija dostavlja se na sljedeći način:

- a) skenira se, odnosno napravi se digitalna kopija dokumenta, u formatu .jpeg ili .pdf, veličina dokumenta, pojedinačno svaki dokument, na način da ne smije biti veća od 1MB i mora biti čitljiva, uz preporuku da se pri skeniranju koriste parametri „Grayscale“ i 300 dpi u omjeru 1:1 (dovoljno je čitljivo i ne kreira previše velike datoteke);
- b) snima se svaki dokument kao posebna datoteka i imenuje se respektabilno po sadržaju;
- c) u nazive datoteka ne stavljaju se slova kao š, đ, ž, č, ć niti specijalni karakteri kao tačka, zarez, navodnik i sl. i
- d) sve datoteke dodaju se u e-mail pod nazivom (Subject) “Prijava PP“ kao prilog (Attachment) i šalju na adresu www.ppprijava@izbori.ba.

(3) Prijava i prateći dokumenti dostavljaju se e-mailom za svako lice posebno, bez obzira da li se radi o članovima iste porodice.

Član 11. **(Obrada prijave)**

(1) Centralna izborna komisija BiH, po prijemu prijave za upis u Centralni birački spisak, provjerava da li je prijava ispravno popunjena, te da li sadrži sve priloge utvrđene u članu 8. stav (2) ovog pravilnika.

(2) Državljeni BiH koji imaju biračko pravo iz člana 8. stav (1) ovog pravilnika u obrascima prijave za glasanje izvan BiH obavezni su da se izjasne o načinu glasanja, da li će glasati putem pošte ili u DKPBiH, i o mjestu glasanja.

(3) Ukoliko se ne izjasne o načinu glasanja, državljani BiH će glasati putem pošte.

(4) Nakon izvršenog uvida Centralna izborna komisija BiH obrađuje prijavu kroz posebnu razvijenu aplikaciju za birače koji glasaju izvan BiH.

(5) U slučaju da prijava ne sadrži sve dokaze utvrđene u članu 8. stav (2) ovog pravilnika ili obrazac prijave nije ispravno popunjen, Centralna izborna komisija BiH putem web stranice obavještava podnosioca prijave, koji je dužan otkloniti nedostatke u prijavi u roku od 10 dana od dana obavještavanja.

(6) Podnositelj prijave može provjeriti rezultate obrade prijave u Centralnoj izbornoj komisiji BiH ili na web stranici Centralne izborne komisije BiH.

Član 12. **(Odbijanje prijave i žalba)**

(1) Ukoliko podnositelj prijave ne postupi na način propisan u članu 11. stav (5) ovog pravilnika, a Centralna izborna komisija BiH na osnovu dostavljene dokumentacije ne može izvršiti upis u Centralni birački spisak, prijava lica za upis u Centralni birački spisak bit će odbijena, a odluka o odbijanju prijave objavit će se na web stranici Centralne izborne komisije BiH.

(2) Za državljanina BiH koji ispunjava uslov za upis u Centralni birački spisak, ali u obrascu nije naveo podatak o adresi u inozemstvu za dostave glasačkog materijala, Centralna izborna komisija BiH izvršit će upis u Centralni birački spisak, ali neće dostavljati materijal u inozemstvo, već će birač svoje biračko pravo moći ostvariti u BiH.

(3) Na odluku o odbijanju prijave za upis u Centralni birački spisak može se uložiti žalba Apelacionom odjelu Suda BiH u roku od dva (2) dana od dana objave odluke na web stranici Centralne izborne komisije BiH.

(4) Žalba se podnosi putem Centralne izborne komisije BiH, a može biti dostavljena e-mailom ili faksom Centralnoj izbornoj komisiji BiH.

Član 13. **(Sadržaj obrasca za prijavu PRP-1)**

PRP-1 obrazac prijave za državljane BiH koji se prvi put prijavljuju za glasanje izvan BiH, koji je sastavni dio ovog pravilnika, sadrži sljedeće podatke:

- a) memorandum Centralne izborne komisije BiH;
- b) oznaku datuma održavanja izbora i vrste izbora;
- c) izjašnjavanje o statusu birača (privremeni boravak u inozemstvu ili status izbjeglog lica iz BiH);
- d) lične podatke podnosioca prijave: ime i prezime, djevojačko / prethodno prezime, datum rođenja, ime i prezime jednog od roditelja, jedinstveni matični broj, spol lica i mjesto rođenja;
- e) izjašnjavanje o biračkoj opciji za birače koji glasaju za Brčko Distrikt BiH;
- f) podatke o prebivalištu u BiH: općina, naseljeno mjesto, ulica i kućni broj;

- g) adresu izvan BiH i kontakt-podaci: ulica i broj, grad, poštanski broj, država, broj telefona i e-mail adresa;
- h) izjašnjenje o načinu glasanja, putem pošte ili u DKPBiH i mjestu glasanja;
- i) potpis podnosioca prijave i datum podnošenja prijave i
- j) uputstvo za popunjavanje obrasca prijave.

Član 14.

(Distribucija obrazaca prijave za glasanje izvan BiH PRP-1)

Centralna izborna komisija BiH distribuirat će obrazac prijave PRP-1 putem:

- a) diplomatsko-konzularnih predstavništava BiH;
- b) klubova i udruženja građana BiH u inozemstvu i
- c) web stranice Centralne izborne komisije BiH i web stranica državnih organa i ureda vladinih i nevladinih organizacija koje se bave izbjeglicama i pitanjima migracije.

POGLAVLJE III. (NAČIN PRIJAVE I PROMJENA BIRAČKE OPCIJE)

Odjeljak A. (Prijava državljana Bosne i Hercegovine koji su upisani u Centralni birački spisak)

Član 15.

(Način prijava birača za glasanje izvan BiH)

(1) Državljanin BiH koji privremeno živi u inozemstvu ili ima status izbjeglice i upisan je u Centralni birački spisak, da bi se nalazio na izvodu za glasanje izvan BiH, dužan je za svake izbore podnijeti prijavu Centralnoj izbornoj komisiji BiH.

(2) Prijava državljana BiH za glasanje izvan BiH sadržava ispunjen i potpisan obrazac prijave iz člana 17. ovog pravilnika i odgovarajuće dokaze o identitetu podnosioca prijave. Valjan dokaz o identitetu podnosioca prijave je kopija jednog od sljedećih važećih dokumenata:

- a) lične karte;
- b) pasoša;
- c) vozačke dozvole;
- d) važeće lične isprave izdate od zemlje domaćina i
- e) izbjegličkog kartona izdatog od vlade zemlje domaćina ili druge međunarodne organizacije.

(3) Prijava mora biti primljena u periodu nakon raspisivanja izbora do roka utvrđenog u članu 5. stav (1) tačka b) ovog pravilnika, a može biti dostavljena na način utvrđen u članu 10. ovog pravilnika.

(4) Ukoliko prijava državljanina BiH iz stava (1) ovog člana ne bude dostavljena u roku iz člana 5. stav (1) tačka b) ovog pravilnika ili ne bude obrađena zbog nekompletnosti, državljanin BiH će se nalaziti na izvodu iz Centralnog biračkog spiska za glasanje na odgovarajućem biračkom mjestu u osnovnoj izbornoj jedinici u kojoj ima prijavljeno prebivalište u skladu s članom 3.12 Izbornog zakona BiH.

(5) Državljanin BiH iz stava (1) ovog člana, koji podnosi prijavu za upis u Centralni birački spisak za osnovnu izbornu jedinicu Brčko Distrikt BiH, a nema određenu biračku opciju entiteta, da bi imao pravo glasa za organe navedene u članu 18.2 Izbornog zakona BiH, mora u prijavi naznačiti biračku opciju entiteta.

(6) Ukoliko državljanin BiH iz stava (1) ovog člana u prijavi ne označi biračku opciju entiteta, neće moći glasati za organe navedene u članu 18.2 Izbornog zakona BiH.

Član 16.
(Distribucija obrazaca prijave za glasanje izvan BiH PRP-2)

Centralna izborna komisija BiH, nakon raspisivanja izbora, obrazac PRP-2 dostavit će svim biračima koji su se na prethodnim izborima nalazili na izvodu iz Centralnog biračkog spiska za glasanje izvan BiH ili su se do dana objave izbora upisali u Centralni birački spisak. Obrazac se dostavlja putem pošte na adresu koju su birači dostavili prilikom posljednje prijave za glasanje izvan BiH ili na drugu (posljednju ažurnu) adresu o čijoj je izmjeni birač obavijestio Centralnu izbornu komisiju BiH do dana raspisivanja izbora.

Član 17.
(Obrazac prijave za državljane BiH upisane u Centralni birački spisak za glasanje izvan BiH PRP-2)

PRP-2 obrazac prijave za državljane BiH koji su se na prethodnim izborima nalazili na izvodu iz Centralnog biračkog spiska za glasanje izvan BiH koji je sastavni dio ovog pravilnika, sadrži sljedeće podatke:

- a) memorandum Centralne izborne komisije BiH;
- b) oznaku datuma održavanja izbora i vrste izbora;
- c) podatke o prethodnom upisu birača u Centralni birački spisak za glasanje izvan BiH: ime i prezime, datum rođenja, jedinstveni matični broj, spol lica, adresa izvan BiH i općina / osnovna izborna jedinica za koju lice ima pravo glasa;
- d) izjašnjavanje o promjeni statusa birača (privremeni boravak u inozemstvu ili status izbjeglog lica iz BiH);
- e) podatke o promjeni adrese izvan BiH: ulica i broj, grad, poštanski broj, država, broj telefona i e-mail adresa;
- f) podatke o promjeni prebivališta u BiH: općina, naseljeno mjesto, ulica i kućni broj;
- g) podatke o biračkoj opciji za birače koji glasaju za Brčko Distrikt BiH;
- h) promjene ličnih podataka: ime i prezime, jedinstveni matični broj;
- i) potpis podnosioca prijave i datum podnošenja prijave;
- j) uputstvo za popunjavanje obrasca prijave i
- k) izjašnjenje o načinu glasanja, putem pošte ili u DKPBiH i mjestu glasanja.

Odjeljak B. (Promjena biračke opcije za birače koji glasaju izvan BiH)

Član 18.
(Postupak i podnošenje zahtjeva PBO-2 za promjenu biračke opcije)

(1) Ako se državljanin BiH koji se nalazi na izvodu iz Centralnog biračkog spiska za glasanje izvan BiH vrati u BiH prije isteka roka za zaključivanje izvoda iz konačnog Centralnog biračkog spiska za naredne izbore, dužan je podnijeti zahtjev za promjenu biračke opcije kako bi bio upisan u izvod iz Centralnog biračkog spiska za glasanje na odgovarajućem biračkom mjestu u osnovnoj izbornoj jedinici u kojoj ima prijavljeno prebivalište u skladu s članom 20.8 Izbornog zakona BiH.

(2) Zahtjev se podnosi nadležnom centru za birački spisak putem PBO-2 obrasca zahtjeva za promjenu biračke opcije za birače koji su glasali izvan BiH, najkasnije u roku utvrđenom u članu 5. stav (1) tačka b) ovog pravilnika. Centar za birački spisak će putem izborne komisije sve obrasce zahtjeva za promjenu biračke opcije birača koji su upisani za glasanje izvan BiH dostaviti Centralnoj izbornoj komisiji BiH najkasnije u roku od sedam dana od dana njihovog prijema, radi ažuriranja promjena biračke opcije birača u Centralnom biračkom spisku.

(3) Uz potpisan i popunjen obrazac PBO-2 birači trebaju dostaviti i dokaz o identitetu. Kao valjan dokaz o identitetu podnosioc prijave iz stava (1) ovog člana prilaže kopiju jednog od važećih dokumenata iz člana 8. stav (3) ovog pravilnika.

(4) Zahtjev za promjenu biračke opcije državljanin BiH koji je glasao izvan BiH podnosi na PBO-2 obrascu zahtjeva. PBO-2 obrazac zahtjeva za promjenu biračke opcije, koji je sastavni dio ovog pravilnika, sadrži sljedeće podatke:

- a) memorandum Centralne izborne komisije BiH;
- b) lične podatke podnosioca prijave: ime i prezime, djevojačko / prethodno prezime, datum rođenja, ime i prezime jednog roditelja, jedinstveni matični broj, spol lica i mjesto rođenja;
- c) podatke o promjeni biračke opcije za birače koji glasaju za Brčko Distrikt BiH;
- d) podatke o adresi prebivališta (općina, naseljeno mjesto, ulica i kućni broj) koja je prijavljena u skladu sa zakonom;
- e) podatke o općini i adresi prebivališta prema popisu 1991. godine ili prebivališta do stjecanja statusa izbjeglog lica;
- f) podatke o dokumentaciji koja se prilaže uz zahtjev;
- g) podatke o biračkoj opciji prema sadržaju obrasca;
- h) potpis podnosioca zahtjeva i datum podnošenja zahtjeva;
- i) podatke o nadležnom centru za birački spisak i
- j) podatke o obrađivaču zahtjeva i datumu obrade zahtjeva.

Odjeljak C. (Promjena ili određivanje biračke opcije za lica koja imaju status raseljenog lica)

Član 19. (Podaci o raseljenim licima)

(1) Evidencije o biračima koji imaju status raseljenog lica za potrebe ažuriranja Centralnog biračkog spiska u elektronskom obliku Centralnoj izbornoj komisiji BiH dostavlja Ministarstvo za ljudska prava i izbjeglice BiH.

(2) Dostavljena evidencija od strane nadležnog organa iz stava (1) sadrži sljedeće podatke o raseljenom licu:

- a) ime i prezime;
- b) ime jednog roditelja;
- c) JMB;
- d) datum rođenja;
- e) općinu boravka;
- f) adrese i
- g) broj i datum akta kojim je utvrđen status raseljenog lica.

(3) Centralna izborna komisija BiH po prijemu evidencija o licima koja imaju status raseljenog lica vrši upoređivanje podataka s podacima u evidencijama Centralnog biračkog spiska, te ukoliko su podaci iz stava (2) tačka c) ili podaci iz stava (2) tačke a), b) i d) ovog člana identični, uvrštava podatak o statusu birača u Centralni birački spisak.

(4) Podaci o licu sa statusom raseljenog lica koji, upoređivanjem podataka po postupku iz stava (3) ovog člana, ne budu pronađeni u Centralnom biračkom spisku dostavljaju se nadležnom organu iz stava (1) ovog člana s ciljem provjere i kompletiranja podataka.

(5) Nakon izvršene provjere nepotpunih ili netačnih podataka nadležni organ iz stava (1) ovog člana dostavlja najkasnije 15 dana od dana prijema Centralnoj izbornoj komisiji BiH ažurirane podatke radi uvrštavanja podataka o statusu birača u Centralni birački spisak.

(6) Lice za koje nadležni organ iz stava (1) ovog člana ne bude dostavio potpune i tačne podatke neće moći imati mogućnost određivanja ili promjene biračke opcije.

(7) Izuzetno od stava (1) ovog člana, raseljenim licem se smatra i državljanin BiH koji se nalazi u evidenciji Agencije za identifikacione dokumente, evidenciju i razmjenu podataka Bosne i Hercegovine koja vodi evidenciju o prebivalištu i boravištu državljana BiH s prijavljenim boravištem raseljenog lica, a ne nalaze se u evidenciji iz stava (2) ovog člana.

Član 20. **(Pojam biračke opcije za raseljeno lice)**

Pod biračkom opcijom za raseljeno lice podrazumijeva se:

- a) izjašnjenje raseljenog lica koje ima biračko pravo da glasa za općinu, odnosno osnovnu izbornu jedinicu u kojoj je imalo prebivalište prema posljednjem popisu stanovništva koji je izvršila država BiH, osim u slučaju kada može predložiti dokaz o promjeni prebivališta u skladu sa zakonom, u periodu od posljednjeg popisa stanovništva koji je izvršila država BiH do trenutka kada je steklo status raseljenog lica (u daljnjem tekstu: općina prebivališta iz 1991. godine). Raseljeno lice koje se izjasni da glasa za općinu prebivališta iz 1991. godine istovremeno se izjašnjava i o načinu glasanja, odnosno da li glasa lično u općini iz 1991. godine ili glasa u odsustvu iz općine, odnosno osnovne izborne jedinice u kojoj ima boravište.
- b) izjašnjenje raseljenog lica koje ima biračko pravo da glasa za općinu, odnosno osnovnu izbornu jedinicu u kojoj ima prijavljeno boravište, pod uslovom da predloži dokaz da ima prijavljeno boravište u toj općini najmanje šest mjeseci prije dana izbora (u daljnjem tekstu: općina boravišta).

Član 21. **(Općina prebivališta iz 1991. godine i općina boravišta za raseljeno lice)**

(1) Podatak o općini prebivališta iz 1991. godine iz člana 20. stav (1) tačka a) ovog pravilnika Centralna izborna komisija BiH preuzima iz baze podataka popisa stanovništva 1991. godine, osim za slučaj da raseljeno lice može predložiti dokaz o promjeni prebivališta u skladu sa zakonom, u periodu od posljednjeg popisa stanovništva koji je izvršila država BiH do trenutka stjecanja statusa raseljenog lica.

(2) Podatak o općini boravišta iz člana 20. stav (1) tačka b) ovog pravilnika Centralna izborna komisija BiH preuzima iz evidencije državnog organa iz člana 3.5. stav (3) Izbornog zakona BiH.

Član 22. **(Zahtjev za određivanje i promjenu biračke opcije PBO-1)**

(1) Raseljeno lice koje ima biračko pravo, a nalazi se u dostavljenim evidencijama utvrđenim u članu 19. ovog pravilnika podnosi lično zahtjev za određivanje ili promjenu biračke opcije Centralnoj izbornoj komisiji BiH putem centra za birački spisak u općini u kojoj ima prijavljeno prebivalište ili boravište raseljenog lica u skladu sa zakonom (u daljnjem tekstu: nadležni centar za birački spisak), odnosno prema evidenciji nadležnog državnog organa iz člana 3.5. stav (3) Izbornog zakona BiH.

(2) Zahtjev za određivanje ili promjenu biračke opcije raseljeno lice podnosi na PBO-1 obrascu zahtjeva za određivanje i promjenu biračke opcije za raseljena lica, koji je sastavni dio ovog pravilnika. Obrazac zahtjeva za određivanje i promjenu biračke opcije raseljenog lica sadrži sljedeće podatke:

- a) memorandum Centralne izborne komisije BiH;
- b) lične podatke podnosioca prijave: ime i prezime, djevojačko / prethodno prezime, datum rođenja, ime i prezime jednog roditelja, jedinstveni matični broj, spol lica i mjesto rođenja;
- c) podatke o promjeni entitetskog državljanstva za birače koji glasaju za Brčko Distrikt BiH;
- d) podatke o adresi prebivališta (općina, naseljeno mjesto, ulica i kućni broj) koja je prijavljena u skladu sa zakonom;
- e) podatke o općini i adresi prebivališta prema popisu 1991. godine ili prebivališta do stjecanja statusa izbjeglog lica;
- f) podatke o dokumentaciji koja se prilaže uz zahtjev;
- g) podatke o biračkoj opciji prema sadržaju obrasca;
- h) potpis podnosioca zahtjeva i datum podnošenja zahtjeva;
- i) podatke o nadležnom centru za birački spisak i
- j) podatke o obrađivaču zahtjeva i datumu obrade zahtjeva.

(3) Uz popunjen obrazac PBO-1 raseljeno lice dužno je priložiti kopiju jednog od važećih identifikacionih dokumenata u skladu s članom 5.12 stav (4) Izbornog zakona BiH i po mogućnosti predočiti broj rješenja o priznavanju statusa raseljenog lica ili broj zahtjeva za priznavanje statusa raseljenog lica evidentiran kod nadležnog organa.

(4) Raseljeno lice može priložiti i kopije drugih dokumenata koji su bitni za utvrđivanje biračke opcije (potvrda o prijavi prebivališta ili boravišta raseljenog lica, dokaz o promjeni prebivališta u odnosu na općinu iz perioda popisa stanovništva 1991. godine i slično).

Član 23.

(Način prijema zahtjeva i rokovi)

(1) Službenik nadležnog centra za birački spisak će raseljenom licu koje je podnijelo zahtjev za određivanje ili promjenu biračke opcije izdati potvrdu o prijemu zahtjeva.

(2) Podnošenje i obrada zahtjeva za određivanje ili promjenu biračke opcije raseljenih lica stalan su proces i oni se podnose nadležnom centru za birački spisak u toku redovnog radnog vremena.

(3) U periodu održavanja redovnih izbora za organe vlasti u BiH, zahtjev se mora podnijeti najkasnije u roku utvđenom u členu 5. stav (1) ovog pravilnika kako bi se promjene biračke opcije ažurirale u evidenciji Centralnog biračkog spiska. Zahtjevi koji budu primljeni nakon ovog roka bit će obrađeni nakon održavanja izbora.

Član 24.

(Obrada zahtjeva)

(1) Na osnovu podnesenog zahtjeva za određivanje ili promjenu biračke opcije, raseljeno lice nalazi će se na:

- a) izvodu iz Centralnog biračkog spiska s pravom glasa za osnovnu izbornu jedinicu, odnosno općinu koja odgovara općini prebivališta iz 1991. godine ako se nalazi u evidenciji iz člana 19. stav (1) ovog pravilnika, odnosno za neku drugu osnovnu izbornu jedinicu, odnosno općinu ako to lice može predočiti dokaz o promjeni prebivališta za tu drugu općinu u skladu sa zakonom u periodu od 1991. godine do trenutka kada je to lice steklo status raseljenog lica. Mjesto i način glasanja raseljenog lica iz ove tačke su:

1) redovno biračko mjesto i lično glasanje u općini prebivališta iz 1991. godine ako se raseljeno lice izjasnilo o namjeri da glasa lično u općini prebivališta iz 1991. godine. Ovo lice bit će upisano u izvod iz Centralnog biračkog spiska osnovne izborne jedinice koja odgovara općini prebivališta iz 1991. godine.

2) biračko mjesto za glasanje u odsustvu iz osnovne izborne jedinice, općine u kojoj ima boravište, za općinu prebivališta iz 1991. godine ako se raseljeno lice izjasnilo o namjeri da glasa u odsustvu iz općine u kojoj ima boravište. Ovo lice bit će upisano u izvod iz Centralnog biračkog spiska osnovne izborne jedinice koja odgovara općini boravišta.

b) izvod iz Centralnog biračkog spiska s pravom glasa za osnovnu izbornu jedinicu, odnosno općinu koja odgovara općini boravišta ako se nalazi u evidenciji iz člana 19. ovog pravilnika i ima prijavljeno boravište u toj općini najmanje šest mjeseci prije dana izbora. Mjesto i način glasanja raseljenog lica iz ove tačke su redovno biračko mjesto i lično glasanje u općini boravišta ako se raseljeno lice izjasnilo o namjeri da glasa za općinu boravišta.

(2) Sve primljene zahtjeve za određivanje ili promjenu biračke opcije nadležni centar za birački spisak obrađuje odmah, a najkasnije u roku od sedam dana po njihovom prijemu. Zahtjevi se obrađuju primjenom računarskog programa i rezultati obrade prosljeđuju se Centralnoj izbornoj komisiji BiH na provjeru i potvrđivanje.

(3) Po obradi zahtjeva i evidentiranju promjene biračke opcije u izvodu iz Centralnog biračkog spiska za raseljena lica podnosiocu zahtjeva omogućit će se uvid u podatke pod kojim je upisan u Centralni birački spisak u nadležnom centru za birački spisak.

Član 25.

(Raseljeno lice koje se ne izjasni o biračkoj opciji)

(1) Ukoliko nisu ispunjeni uslovi iz zahtjeva za određivanje ili promjenu biračke opcije koji je podnijelo raseljeno lice, ili ukoliko raseljeno lice nije podnijelo zahtjev za određivanje ili promjenu biračke opcije do roka iz člana 5. stav (1) tačka b) ovog pravilnika, Centralna izborna komisija BiH će za naredne izbore upisati raseljeno lice koje ima biračko pravo u Centralni birački spisak s pravom glasa za osnovnu izbornu jedinicu i načinom glasanja prema podacima pod kojima je lice bilo upisano u Centralni birački spisak na posljednjim izborima.

(2) Ukoliko raseljeno lice iz stava (1) ovog člana, kojem je takav status utvrđen u skladu sa zakonom i ovim pravilnikom, prethodno nije bilo upisano u Centralni birački spisak, Centralna izborna komisija BiH će za naredne izbore ovakvo lice upisati u Centralni birački spisak s pravom glasa za osnovnu izbornu jedinicu u kojoj je imalo prebivalište prema posljednjem popisu stanovništva u Bosni i Hercegovini. Ova raseljena lica glasat će u odsustvu i bit će upisana u izvod iz Centralnog biračkog spiska osnovne izborne jedinice koja odgovara općini boravišta da glasaju na biračkom mjestu za glasanje u odsustvu.

(3) U postupku utvrđivanja načina glasanja i određivanja odgovarajućeg biračkog mjesta za raseljena lica iz st. (1) i (2) ovog člana Centralna izborna komisija BiH koristi će raspoložive podatke o mjestu prebivališta ili boravišta raseljenog lica iz evidencije nadležnog državnog organa iz člana 3.5 stav (3) Izbornog zakona BiH.

Odjeljak D. (Promjena ili određivanje biračke opcije iz Brčko Distrikta BiH u Centralni birački spisak za glasanje izvan BiH)

Član 26. (Brčko Distrikt BiH)

(1) Državljanin BiH koji je upisan u Centralni birački spisak za glasanje za Brčko Distrikt BiH, da bi imao pravo glasa za organe navedene u članu 18.2 Izbornog zakona BiH, mora imati određeno entitetsko državljanstvo u skladu sa zakonom.

(2) Izuzetno od odredbi stava (1) ovog člana, državljanin BiH koji je upisan u Centralni birački spisak za Brčko Distrikt BiH, a kojem nije određeno entitetsko državljanstvo u skladu sa zakonom, a koje ima podatak o biračkoj opciji entiteta u Centralnom biračkom spisku iz perioda aktivne registracije birača, Centralna izborna komisija BiH preuzet će navedeni podatak o biračkoj opciji i koristiti za potrebe Općih izbora 2010. godine.

(3) Državljanin BiH koji je upisan u Centralni birački spisak za glasanje za Brčko Distrikt BiH, a ne nalazi se u kategoriji birača iz st. (1) i (2) ovog člana, da bi glasao na Općim izborima 2010. godine, dužan je lično podnijeti zahtjev Centralnoj izornoj komisiji BiH, putem Centra za birački spisak Brčko Distrikta BiH, za određivanje biračke opcije popunjavanjem obrasca PBD-1 do roka utvrđenog u članu 5. stav (1) tačka b) ovog pravilnika.

(4) Uz popunjen obrazac PBD-1 podnosilac zahtjeva iz stava (3) dužan je priložiti kopiju jednog od važećih identifikacionih dokumenata u skladu s članom 5.12 stav (4) Izbornog zakona BiH.

(5) Zahtjev za određivanje biračke opcije Centar za birački spisak Brčko Distrikta BiH obrađuje i dostavlja Centralnoj izornoj komisiji BiH u roku od sedam dana od dana prijema zahtjeva. Centralna izborna komisija BiH nakon izvršenih provjera upisuje podatak o biračkoj opciji u Centralni birački spisak.

POGLAVLJE IV. (IZVODI IZ CENTRALNOG BIRAČKOG SPISKA)

Odjeljak A. (Privremeni izvod iz Centralnog biračkog spiska)

Član 27. (Vrste privremenih izvoda iz Centralnog biračkog spiska i način izrade)

(1) U godini kada se održavaju izbori izvodi iz Centralnog biračkog spiska izlažu se na uvid javnosti najkasnije 120 dana prije dana održavanja izbora u svrhu izrade konačnog Centralnog biračkog spiska, koji će se koristiti za održavanje izbora.

(2) Izvodi iz Centralnog biračkog spiska su:

- a) izvod iz Centralnog biračkog spiska za redovne birače koji je sačinjen na osnovu podataka o biračima iz evidencije Agencije za identifikacione dokumente, evidenciju i razmjenu podataka Bosne i Hercegovine osim birača iz tačke b) ovog člana i
- b) izvod iz Centralnog biračkog spiska za raseljena lica koji je sačinjen na osnovu:
 - 1) podataka o biračima iz evidencije Ministarstva za ljudska prava i izbjeglice BiH,
 - 2) podataka o biračima iz evidencije Agencije za identifikacione dokumente, evidenciju i razmjenu podataka Bosne i Hercegovine koji imaju boravište raseljenog lica i
 - 3) podataka koje dostave građani BiH u skladu s Izbornim zakonom BiH.

(3) Navedene podatke organi iz stava (2) ovog člana dostavljaju Centralnoj izbornoj komisiji BiH najkasnije u roku deset dana od dana raspisivanja izbora, sa stanjem na dan raspisivanja izbora.

(4) Izvod iz stava (2) tačka a) ovog člana izrađuje se na obrascu izvoda iz Centralnog biračkog spiska za redovne birače.

(5) Izvod iz stava (2) tačka b) ovog člana izrađuje se u elektronskom obliku.

Član 28. **(Sadržaj izvoda)**

(1) Izvod iz Centralnog biračkog spiska za redovne birače sadrži sljedeće podatke:

- a) prezime i ime i ime jednog roditelja birača;
- b) datum rođenja;
- c) spol;
- d) JMB u obliku bar-koda;
- e) naziv općine, grada, odnosno Brčko Distrikta BiH;
- f) naziv i šifru biračkog mjesta;
- g) šifru adrese i
- h) rubriku za potpis glasača.

(2) Izvod iz Centralnog biračkog spiska za raseljena lica sadrži sljedeće podatke:

- a) prezime i ime i ime jednog roditelja birača;
- b) datum rođenja;
- c) spol,
- d) JMB u obliku bar-koda;
- e) punu adresu prebivališta ili boravišta raseljenog lica (općina, grad, Brčko Distrikt BiH, naseljeno mjesto, ulica i kućni broj) koje je prijavljeno u skladu sa zakonom;
- f) općinu i adresu prebivališta prema popisu 1991. godine ili prebivališta do stjecanja statusa raseljenog lica, ukoliko se raspolože ovim podatkom i kombinaciju glasačkih listića i
- g) rubriku za potpis glasača.

Član 29. **(Način štampanja)**

Podaci u izvodu iz Centralnog biračkog spiska štampat će se na jezicima i pismima koji su u službenoj upotrebi u BiH.

Član 30. **(Dostavljanje izvoda)**

(1) Izvod iz Centralnog biračkog spiska dostavlja se općinskoj izbornoj komisiji, izbornim komisijama gradova i Izornoj komisiji Brčko Distrikta BiH (u daljnjem tekstu: izborne komisije).

(2) Izborne komisije dužne su izložiti izvode iz Centralnog biračkog spiska iz člana 27. stav (2) tačka a) ovog pravilnika kako bi državljani BiH s biračkim pravom imali pristup njima i mogli provjeriti i izvršiti ispravku ili dopunu svojih podataka kod nadležnog organa.

(3) Izborne komisije dužne su obavijestiti birače iz člana 27. stav (2) tačka b) ovog pravilnika da se izvod iz Centralnog biračkog spiska nalazi u centru za birački spisak kako bi mogli provjeriti i izvršiti ispravku ili dopunu svojih podataka kod nadležnog organa i opredijeliti se za biračku opciju (općina, odnosno mjesto glasanja i način glasanja - lično ili u odsustvu).

(4) Uz izvod iz člana 27. stav (2) tačka b) ovog pravilnika Centralna izborna komisija BiH dostavlja izbornim komisijama i obrazac zahtjeva iz člana 20. ovog pravilnika kako bi raseljeno lice imalo mogućnost da odabere biračku opciju određenu članom 20.8 Izbornog zakona BiH. Izborne komisije primaju zahtjev od raseljenog lica u roku utvrđenom u članu 5. stav (1) tačka b) ovog pravilnika i dostavljaju ga Centralnoj izornoj komisiji BiH u elektronskoj formi radi ažuriranja izvoda iz Centralnog biračkog spiska za raseljena lica.

Član 31. **(Plan izlaganja izvoda)**

(1) Izborne komisije donose plan izlaganja izvoda iz člana 27. stav (2) tačka a) ovog pravilnika. Ovaj plan obuhvata način obavještavanja javnosti o trajanju izlaganja ovog izvoda i mjestima na kojima će izvodi iz Centralnog biračkog spiska biti izloženi, odnosno dostupni, kao i način obavještavanja raseljenih lica o načinu određivanja biračke opcije u centru za birački spisak. Izborne komisije putem plana osiguravaju svim licima i političkim subjektima pristup kako bi mogli provjeriti svoje podatke u izvodu iz Centralnog biračkog spiska, te izvršiti njihovu ispravku kod nadležnog organa. Izlaganje izvoda iz Centralnog biračkog spiska traje 30 dana od dana utvrđenog u članu 27. stav (1) ovog pravilnika.

(2) Izborne komisije dostavljaju planove iz stava (1) ovog člana Centralnoj izornoj komisiji BiH najkasnije 125 dana prije dana održavanja izbora. Ukoliko Centralna izborna komisija BiH ustanovi da planovima iz stava (1) ovog člana nije utvrđen primjeren način obavještavanja javnosti i raseljenih lica, naložit će izornoj komisiji preduzimanje dodatnih mjera i aktivnosti.

Član 32. **(Zahtjev za ispravke podataka)**

Birači koji u periodu izlaganja izvoda iz Centralnog biračkog spiska uoče nepravilnosti i pogrešne podatke imaju pravo zahtijevati njihovu ispravku ukoliko se radi o ispravci ličnih podataka. Zahtjev se podnosi organu nadležnom za vođenje podataka čija se ispravka zahtijeva.

Odjeljak B. (Izvod iz konačnog Centralnog biračkog spiska)

Član 33. **(Vrste izvoda)**

(1) Izvode iz konačnog Centralnog biračkog spiska izrađuje Centralna izborna komisija BiH za svaku osnovnu izbornu jedinicu najkasnije 40 dana prije dana održavanja izbora.

(2) Centralna izborna komisija BiH izrađuje:

- a) izvod iz konačnog Centralnog biračkog spiska za redovne birače;
- b) izvod iz konačnog Centralnog biračkog spiska za sve birače koji glasaju izvan BiH;
- c) izvod iz konačnog Centralnog biračkog spiska za birače koji glasaju izvan BiH za glasanje u diplomatsko-konzularnom predstavništvu Bosne i Hercegovine (u daljnjem tekstu: DKPBiH)
i
- d) izvod iz konačnog Centralnog biračkog spiska za birače koji imaju status raseljenog lica.

Izborne komisije izrađuju:

- a) izvod iz konačnog Centralnog biračkog spiska za birače koji su vezani za svoje domove zbog starosti, bolesti ili invaliditeta i
- b) izvod iz konačnog Centralnog biračkog spiska za birače koji su zatvorenici ili su vezani za ustanove, a imaju biračko pravo.

(3) Podaci u izvodu iz Centralnog biračkog spiska štampat će se na jezicima i pismima koji su u službenoj upotrebi u BiH.

(4) U izvodu iz konačnog Centralnog biračkog spiska nalazi se datum njegovog zaključivanja i napomena da promjene izvršene poslije tog datuma nisu uzete u obzir.

Član 34.

(Izvod iz konačnog Centralnog biračkog spiska za redovne birače)

(1) Izvod iz konačnog Centralnog biračkog spiska za redovne birače sadrži sve birače s pravom glasa za tu osnovnu izbornu jedinicu prema biračkim mjestima.

(2) Izvod iz konačnog Centralnog biračkog spiska iz stava (1) ovog člana koji se koristi na biračkom mjestu na dan održavanja izbora dostavlja se izbornim komisijama najkasnije 20 dana prije dana održavanja izbora.

(3) Birač koji promijeni prebivalište u periodu od 45 dana prije održavanja izbora do dana održavanja izbora naći će se na izvodu iz Centralnog biračkog spiska na redovnom biračkom mjestu u općini u kojoj je imao prebivalište do dana promjene prebivališta.

(4) Državljanin BiH koji ima biračko pravo, a ne nalazi se u zaključenom izvodu iz Centralnog biračkog spiska može glasati ukoliko biračkom odboru predoče Obavještenje (potvrdu) izdato od Agencije za identifikacione dokumente, evidenciju i razmjenu podataka Bosne i Hercegovine na Obrascu LK-OI-4.

(5) Centralna izborna komisija BiH za birače iz stava (4) ovog člana izrađuje dodatak izvoda iz konačnog Centralnog biračkog spiska, kojim dopunjava izvod iz stava (1) ovog člana.

Član 35.

(Izvod iz konačnog Centralnog biračkog spiska za birače koji glasaju izvan BiH)

(1) Izvod iz konačnog Centralnog biračkog spiska za birače koji glasaju izvan BiH sadrži:

- a) državljane BiH koji imaju biračko pravo i koji privremeno borave izvan BiH i
- b) državljane BiH koji imaju biračko pravo i koji imaju status izbjeglog lica iz BiH.

(2) Izvod iz konačnog Centralnog biračkog spiska za birače koji glasaju izvan BiH izrađuje i potvrđuje Centralna izborna komisija BiH, na osnovu prijave državljana BiH iz stava (1) ovog člana, za svake izbore za organe vlasti u BiH i koristi se na biračkom mjestu za glasanje nepotvrđenim glasačkim listićima na dan održavanja izbora.

Član 36.
(Izvod iz konačnog Centralnog biračkog spiska za birače koji glasaju izvan BiH za glasanje u DKPBiH)

(1) Izvod iz konačnog Centralnog biračkog spiska za birače koji glasaju izvan BiH za glasanje u DKPBiH sadrži:

- a) državljane BiH koji imaju biračko pravo, koji su se izjasnili da glasaju u DKPBiH i koji privremeno borave izvan BiH i
- b) državljani BiH koji imaju biračko pravo, koji su se izjasnili da glasaju u DKPBiH i koji imaju status izbjeglog lica iz BiH.

(2) Izvod iz konačnog Centralnog biračkog spiska za birače koji glasaju izvan BiH za glasanje u DKPBiH izrađuje i potvrđuje Centralna izborna komisija BiH, na osnovu prijave državljanina BiH, za svake izbore za organe vlasti u BiH.

(3) Izvod iz konačnog Centralnog biračkog spiska iz stava (1) ovog člana, koji se koristi na biračkom mjestu na dan održavanja izbora u DKPBiH, izrađuje Centralna izborna komisija BiH i dostavlja, putem Ministarstva vanjskih poslova Bosne i Hercegovine u DKPBiH najkasnije 20 dana prije dana održavanja izbora.

Član 37.
(Izvod iz konačnog Centralnog biračkog spiska za birače koji imaju status raseljenog lica)

Izvod iz konačnog Centralnog biračkog spiska za birače koji imaju status raseljenog lica sačinjava se na osnovu dostavljenih podataka nadležnog organa iz člana 3.5 stav (3) Izbornog zakona BiH i podataka pribavljenih od građana u skladu s Izbornim zakonom BiH.

Član 38.
(Izvod iz konačnog Centralnog biračkog spiska za birače koji su vezani za svoje domove zbog starosti, bolesti ili invaliditeta)

(1) Izvodi iz konačnog Centralnog biračkog spiska za birače koji su vezani za svoje domove zbog starosti, bolesti ili invalidnosti sačinjavaju se na osnovu podataka nadležnog organa zaduženog za socijalno staranje i drugih organa koji imaju podatke o ovim licima, te izražene volje ovih birača da na dan izbora glasaju u svojim domovima.

Član 39.
(Postupak izrade izvoda)

(1) S ciljem evidentiranja birača koji su zbog starosti, bolesti ili invalidnosti vezani za svoje domove, izborne komisije će najkasnije u roku od 40 dana prije dana održavanja izbora pismenim putem zahtijevati od nadležnih organa podatke o svim licima koja su zbog starosti, bolesti ili invalidnosti vezana za svoje domove.

(2) Nadležni organi dužni su na zahtjev izborne komisije dostaviti tražene podatke iz stava (1) ovog člana najkasnije u roku sedam dana od dana prijema zahtjeva. Podaci koje dostavljaju su: ime, prezime, datum rođenja, jedinstveni matični broj i puna adresa prebivališta, odnosno boravišta za raseljena lica (ulica i kućni broj, naseljeno mjesto i naziv općine / osnovne izborne jedinice).

(3) Na osnovu dostavljenih podataka iz stava (2) ovog člana izborna komisija će putem centra za birački spisak provjeriti koje se od navedenih lica nalazi u izvodu iz Centralnog biračkog spiska te osnovne izborne jedinice.

(4) Centar za birački spisak, na osnovu podataka primljenih od organa iz stava (1) ovog člana, sačinit će plan posjeta birača vezanih za domove. Plan se podnosi izornoj komisiji koja ga odobrava. Centar za birački spisak, na osnovu odobrenog plana, obilazi lica vezana za domove i utvrđuje da li svako pojedino lice želi glasati u svom domu. Izborna komisija utvrđuje način na koji će ovi birači biti obaviješteni o procesu evidentiranja za glasanje u njihovim domovima i odobrenom planu posjeta.

(5) Evidentiranje ove kategorije birača vrši se u periodu od dana dostavljanja podataka nadležnog organa iz stava (2) ovog člana, a najkasnije u roku 15 dana prije dana održavanja izbora.

(6) Izborna komisija, na osnovu informacija dobijenih od centra za birački spisak, u izvodu iz konačnog Centralnog biračkog spiska za sva lica koja imaju biračko pravo jasno će označiti da se radi o biračima koji glasaju u svojim domovima. Na izvodu iz konačnog Centralnog biračkog spiska, u koloni «potpis», pored imena birača stavlja se oznaka «MOBILNI TIM».

(7) U skladu sa stavom (5) ovog člana izborna komisija sačinjava poseban izvod iz Centralnog biračkog spiska za birače koji su vezani za svoje domove i koji glasaju na području te općine, odnosno osnovne izborne jedinice (u daljnjem tekstu: dopunski izvod za birače vezane za svoje domove). Dopunski izvod za birače vezane za svoje domove sadrži sve podatke kao izvod iz konačnog Centralnog biračkog spiska osnovne izborne jedinice i koristi se na dan izbora s ciljem glasanja birača koji su vezani za svoje domove. Centralna izborna komisija BiH će način glasanja birača koji glasaju u svojim domovima putem mobilnog tima za glasanje utvrditi posebnim pravilnikom.

(8) Ukupne podatke o broju birača koji glasaju u svojim domovima na području te osnovne izborne jedinice izborna komisija dostavlja Centralnoj izornoj komisiji BiH najkasnije deset dana prije dana održavanja izbora.

Član 40.

(Izvod iz konačnog Centralnog biračkog spiska za birače koji su zatvorenici ili su vezani za ustanove a imaju pravo glasati)

Izvod iz konačnog Centralnog biračkog spiska za lica koja su zatvorenici ili su vezana za ustanove (kazneno-popravni domovi, pritvorske jedinice, gerijatrijske, distrofičarske ili druge zdravstvene ustanove) i imaju pravo glasati sačinjava se na osnovu podataka dobijenih od ustanova u kojima su ova lica smještena.

Član 41.

(Postupak izrade izvoda)

(1) S ciljem evidentiranja birača koji su zatvorenici ili su vezani za ustanove (u daljnjem tekstu: birači vezani za ustanove), izborne komisije će, najkasnije u roku od 40 dana prije dana održavanja izbora, pismenim putem zahtijevati od nadležnih organa iz člana 40. ovog pravilnika podatke o svim licima koja su vezana za ustanove na području date općine, odnosno osnovne izborne jedinice.

(2) Nadležni organi iz člana 40. ovog pravilnika dužni su na zahtjev izborne komisije dostaviti tražene podatke iz stava (1) ovog člana najkasnije u roku sedam dana od dana prijema zahtjeva. Podaci koje dostavljaju su: ime, prezime, datum rođenja, jedinstveni matični broj, puna adresa prebivališta, odnosno boravišta za raseljena lica (ulica i kućni broj, naseljeno mjesto i naziv općine / osnovne izborne jedinice) i da li će se lice na dan održavanja izbora nalaziti u ustanovi iz člana 40. ovog pravilnika.

(3) Na osnovu dostavljenih podataka iz stava (2) ovog člana, izborna komisija će putem centra za birački spisak provjeriti koje se od navedenih lica nalazi u izvodu iz Centralnog biračkog spiska te osnovne izborne jedinice.

(4) Centar za birački spisak, na osnovu podataka primljenih od organa iz stava (1) ovog člana, sačiniti će plan posjeta birača vezanih za ustanove. Plan se podnosi izornoj komisiji koja ga odobrava. Centar za birački spisak, na osnovu odobrenog plana, obilazi lica vezana za ustanove i utvrđuje da li svako pojedino lice želi glasati u ustanovi ili mijenja biračku opciju ukoliko se radi o raseljenom licu. Izborna komisija utvrđuje način na koji će ovi birači biti obaviješteni o procesu evidentiranja za glasanje u ustanovama i odobrenom planu posjeta biračima u saradnji s rukovodećim organom te ustanove.

(5) Evidentiranje ove kategorije birača vrši se u periodu od dana dostavljanja podataka nadležnog organa iz stava (2) ovog člana, a najkasnije u roku od 15 dana prije dana održavanja izbora.

(6) Za lica koja nemaju prebivalište u osnovnoj izornoj jedinici iz stava (1) ovog člana gdje se nalazi ustanova, a na dan održavanja izbora će se nalaziti u ustanovi iz člana 21. ovog pravilnika, izborna komisija će odmah dostaviti podatke izornoj komisiji osnovne izborne jedinice u kojoj ta lica imaju prijavljeno prebivalište, a najkasnije u roku od 10 dana prije dana održavanja izbora, radi evidentiranja da će ta lica glasati u ustanovi na području druge osnovne izborne jedinice.

(7) Nadležna izborna komisija iz st. (3) i (6) ovog člana, na osnovu informacija dobijenih od centra za birački spisak, odnosno od druge izborne komisije, u izvodu iz konačnog Centralnog biračkog spiska za sva lica koja imaju biračko pravo i nalaze se na izvodu iz konačnog Centralnog biračkog spiska te osnovne izborne jedinice jasno će označiti da se radi o biračima koji glasaju u ustanovi. Na izvodu iz konačnog Centralnog biračkog spiska, u koloni «potpis», pored imena birača stavlja se oznaka «MOBILNI TIM» zajedno s podatkom o nazivu i sjedištu ustanove.

(8) U skladu sa stavom (7) ovog člana, izborna komisija sačinjava poseban izvod iz Centralnog biračkog spiska za birače koji su vezani za ustanove i koji glasaju u tim ustanovama bez obzira na osnovnu izbornu jedinicu u kojoj imaju prebivalište (u daljnjem tekstu: dopunski izvod za birače vezane za ustanove). U dopunski izvod za birače vezane za ustanovu upisuju se svi podaci o biračima koji glasaju u ustanovi na području te osnovne izborne jedinice i koristi se na dan održavanja izbora u svrhu glasanja birača koji su vezani za ustanovu. Centralna izborna komisija BiH će način glasanja birača koji glasaju u ustanovi putem mobilnog tima za glasanje utvrditi posebnim pravilnikom.

(9) Ukupne podatke o broju birača koji glasaju u ustanovama na području te osnovne izborne jedinice izborna komisija dostavlja Centralnoj izornoj komisiji BiH najkasnije deset dana prije dana održavanja izbora.

Član 42.

(Izvodi iz Centralnog biračkog spiska za provođenje opoziva funkcionera, prijevremene izbore i izbore organa lokalne samouprave)

(1) Centralna izborna komisija BiH na osnovu podataka iz Centralnog biračkog spiska može utvrditi i druge izvode iz Centralnog biračkog spiska utvrđene u članu 3.7 Izbornog zakona BiH.

(2) Za potrebe provođenja postupka opoziva izabranog funkcionera, prijevremenih izbora i izbora za organe lokalne samouprave Centralna izborna komisija BiH utvrđuje sljedeće izvode iz Centralnog biračkog spiska:

- a) izvodi iz Centralnog biračkog spiska za potrebe provođenja postupka opoziva izabranog funkcionera;
- b) izvodi iz Centralnog biračkog spiska za potrebe provođenja prijevremenih izbora i
- c) izvodi iz Centralnog biračkog spiska za potrebe izbora organa lokalne samouprave.

(3) Izvodi iz Centralnog biračkog spiska utvrđeni u stavu (2) ovog člana sadrže sljedeće podatke:

- a) prezime i ime i ime jednog roditelja birača;
- b) datum rođenja;
- c) spol;
- d) naziv općine, grada, odnosno Brčko Distrikta BiH i
- e) rubriku za potpis glasača.

(4) Izvodi iz Centralnog biračkog spiska iz stava (2) tačke a) i b) ovog člana izrađuju se pojedinačno za svako biračko mjesto i pored podataka navedenih u stavu (3) ovog člana sadrže i podatak o biračkom mjestu.

(5) Izvodi iz Centralnog biračkog spiska iz stava (2) tačka c) ovog člana izrađuju se pojedinačno prema naseljenom mjestu (ulici) koje čine odgovarajući organ lokalne samouprave i sadrže pored podataka iz stava (2) ovog člana i podatak o nazivu naseljenog mjesta.

(6) Izvode iz stava (2) ovog člana izrađuje Centralna izborna komisija BiH po zahtjevu nadležnog organa.

(7) Zahtjev iz stava (6) ovog člana nadležni organ dostavlja najkasnije 30 dana prije dana održavanja izbora i uz isti je dužan priložiti odluku o raspisivanju izbora koja obavezno sadrži datum održavanja navedenih izbora.

(8) Izvode iz stava (2) tačka c) ovog člana Centralna izborna komisija BiH dostavlja u elektronskom obliku i njihovo štampanje vrši nadležni organ za provođenje izbora.

(9) Centralna izborna komisija BiH utvrđuje i zaključuje Centralni birački spisak prema postupku utvđenom u članu 5. ovog pravilnika.

(10) Sve promjene koje nastanu u Centralnom biračkom spisku nakon utvrđivanja i zaključivanja Centralnog biračkog spiska neće biti uzete u obzir.

(11) Centralna izborna komisija BiH će posebnim aktom utvrditi rokove izrade izvoda iz Centralnog biračkog spiska iz stava (2) ovog člana.

POGLAVLJE III. (DOSTAVLJANJE PODATAKA CENTRALNOJ IZBORNOJ KOMISIJI BiH)

Član 43. (Način i rokovi)

(1) Nadležni državni organ iz člana 3.5 stav (3) Izbornog zakona BiH dužan je po zahtjevu Centralne izborne komisije BiH dostaviti presjek stanja podataka u evidenciji, koji sadrži podatke utvrđene u članu 3.10 stav (1) tačke od a) do h) Izbornog zakona BiH, u elektronskom obliku, u godini kada se provode izbori u sljedećim rokovima:

- a) 150 dana prije dana održavanja izbora;
- b) 65 dana prije dana održavanja izbora;
- c) 45 dana prije dana održavanja izbora i
- d) za dan izbora.

(2) Dostavljeni podaci moraju biti sa stanjem na dan naveden u tačkama a), b), c) i d) ovog člana, te moraju biti u obliku i sadržavati podatke iz stava (1) ovog člana tako da omogućavaju daljnju obradu i korištenje podataka.

(3) Centralna izborna komisija BiH može odrediti i druge rokove za dostavljanje podataka koji su potrebni za provođenje pojedinih izbornih aktivnosti.

POGLAVLJE IV. (POSEBNE EVIDENCIJE)

Član 44. (Vrste evidencija)

(1) Centralna izborna komisija BiH vodi posebne evidencije o licima kojima je po osnovu zakona oduzeto pravo da glasaju, kako slijedi:

- a) licu koje je pravosnažnom odlukom nadležnog organa lišeno potpune poslovne sposobnosti i
- b) licu koje ima smetnje prema članovima 1.6, 1.7. i 1.7a Izbornog zakona BiH.

(2) Evidencije iz stava (1) ovog člana sadrže sljedeće podatke:

- a) prezime;
- b) ime;
- c) ime jednog roditelja;
- d) jedinstveni matični broj;
- e) naziv organa koji je donio akt;
- f) broj akta,
- g) datum akta i
- h) rubriku „napomena“.

Član 45. (Način evidentiranja)

(1) O licima iz člana 44. stav (1) ovog pravilnika u rubrici „napomena“ iz člana 3.10 stav (1) tačka i) Izbornog zakona BiH bit će evidentirane činjenice i ona se neće naći na izvodima iz konačnog Centralnog biračkog spiska.

(2) Evidentiranje se vrši na sljedeći način:

- a) za lica iz člana 44. stav (1) tačka a) ovog pravilnika - PS broj i datum rješenja i
- b) za lica iz člana 44. stav (1) tačka b) ovog pravilnika - IZ broj i datum akta.

(3) Ukoliko licu evidentiranom u Centralnom biračkom spisku bude vraćeno biračko pravo u skladu sa zakonom, podaci upisani u napomenu se brišu i licu se vraća biračko pravo.

POGLAVLJE V. (CENTAR ZA BIRAČKI SPISAK)

Odjeljak A. (Način uspostavljanja, oprema i obuka)

Član 46. (Način uspostavljanja)

- (1) U svakoj općini, gradu i Brčko Distriktu BiH nadležni općinski organ uspostavlja centar.
- (2) Nadležni organ iz stava (1) ovoga člana donosi akt o uspostavljanju centra. Aktom o uspostavljanju centra utvrđuju se unutrašnja organizacija i sistematizacija centra, lica koja rukovode centrom, način rukovođenja centrom, ovlaštenja u vođenju Centralnog biračkog spiska, odgovornost za rad centra, odgovornost zaposlenih u centru, kao i ostala pitanja bitna za rad centra.
- (3) Uredi u kojima se vode i čuvaju matične knjige kao i drugi uredi dostupni javnosti mogu služiti kao centar i kao takvi moraju biti vidno označeni.

Član 47. (Oprema)

Centar se uspostavlja u prostoriji koja će biti opremljena, pored ostalog, i jednim računarom koji će se koristiti za potrebe centra, telefonskom linijom s direktnim izlazom, te internet konekcijom i aplikacijom za vođenje Centralnog biračkog spiska.

Član 48. (Obuka)

Obuku zaposlenih u centru obavlja izborna komisija osnovne izborne jedinice na osnovu posebnog plana i programa koji je obavezna donijeti u skladu s planom i programom edukacije organa za provođenje izbora, koje donosi Centralna izborna komisija BiH.

Odjeljak B. (Nadležnosti, odgovornost za rad i radno vrijeme centra)

Član 49. (Nadležnosti)

- (1) Centar:
 - a) pruža tehničku pomoć izornoj komisiji osnovne izborne jedinice u određivanju biračkih mjesta na teritoriji osnovne izborne jedinice i raspoređivanju birača po biračkim mjestima, ažurira podatke o biračkim mjestima i promjenama biračke opcije u skladu s aktima Centralne izborne komisije BiH, vodi evidenciju o svim naseljenim mjestima i nazivima svih ulica na teritoriji svoje općine i o svim promjenama obavještava izbornu komisiju osnovne izborne jedinice;
 - b) prima zahtjeve raseljenih lica za određivanje ili promjenu biračke opcije;
 - c) prima zahtjeve za promjenu biračke opcije lica upisanih u izvod iz Centralnog biračkog spiska za glasanje izvan BiH, a radi se o licima koja su se vratila u zemlju prije roka utvrđenog za zaključenje izvoda iz Centralnog biračkog spiska;
 - d) učestvuje u realizaciji izlaganja izvoda iz privremenog Centralnog biračkog spiska;
 - e) osigurava uvid u izvod iz Centralnog biračkog spiska na teritoriji svoje osnovne izborne jedinice;
 - f) osigurava i druge podatke za Centralni birački spisak koji su utvrđeni aktima Centralne izborne komisije BiH;

- g) pruža tehničku pomoć izbornoj komisiji osnovne izborne jedinice u vezi sa zahtjevima i prigovorima birača koji se odnose na izvod iz Centralnog biračkog spiska;
- h) pruža tehničku pomoć izbornoj komisiji osnovne izborne jedinice prilikom imenovanja biračkih odbora (pomoć pri žrijebanju, kod izrade akata o imenovanju, obuke biračkih odbora i sl.);
- i) pruža tehničku pomoć izbornoj komisiji osnovne izborne jedinice prilikom provjere i pripreme biračkih mjesta za izbore;
- j) pruža tehničku pomoć izbornoj komisiji osnovne izborne jedinice u kampanji obavještanja birača o svim segmentima u vezi s izbornim procesom;
- k) pruža tehničku pomoć izbornoj komisiji osnovne izborne jedinice prilikom objedinjavanja izbornih rezultata na nivou osnovne izborne jedinice, a Centralnoj izbornoj komisiji BiH obavezan je dostaviti rezultate sa svih redovnih biračkih mjesta u elektronskoj verziji, urađenoj u računarskom programu dobijenom od Centralne izborne komisije BiH, za sve nivoe i sve kategorije (po političkim subjektima i kandidatima unutar političkih subjekata) i
- l) druge poslove koje im odredi Centralna izborna komisija BiH i izborna komisija osnovne izborne jedinice prema propisima Centralne izborne komisije BiH.

(2) Centar vodi evidenciju podnesenih zahtjeva i prigovora iz stava (1) tačka g) ovog člana i dužan je čuvati dokumentaciju priloženu uz te zahtjeve i prigovore.

Član 50. **(Odgovornost za rad)**

(1) Nadležni organ iz člana 46. stav (1) ovog pravilnika odgovoran je za rad centra.

(2) Izborna komisija osnovne izborne jedinice ima pravo izvršiti kontrolu rada centra.

(3) Izborna komisija osnovne izborne jedinice može po saznanju pokrenuti postupak po službenoj dužnosti protiv zaposlenog u centru koji povređuje prava birača ili političkog subjekta ustanovljena Izbornim zakonom BiH i ovim pravilnikom.

Član 51. **(Radno vrijeme)**

(1) Redovno radno vrijeme centra jednako je radnom vremenu organa uprave osnovne izborne jedinice.

(2) Ako se u određenom periodu poveća obim posla, nadležni organ iz člana 46. stav (1) ovog pravilnika, samostalno ili na prijedlog izborne komisije osnovne izborne jedinice, može naložiti da centar radi i duže od redovnog radnog vremena, kao i da radi u dane vikenda i praznika.

(3) Centar je obavezan na pogodan način obavijestiti birače o radnom vremenu centra.

POGLAVLJE VI. (ZAVRŠNE ODREDBE)

Član 52. **(Prestanak primjene)**

Stupanjem na snagu ovog pravilnika prestaje primjena Pravilnika o vođenju Centralnog biračkog spiska („Službeni glasnik BiH“, br. 37/08 i 69/08), Uputstva o postupku i načinu slanja, primanja, obrade, arhiviranja i zaštite elektronskih prijava i dokumenata („Službeni glasnik BiH“, broj 47/08) i Uputstva o načinu i nadležnostima odgovornosti za rad i rokovima za uspostavljanje centra za birački spisak („Službeni glasnik BiH“, broj 36/06).

Član 53.
(Sastavni dio Pravilnika)

Sastavni dio ovog pravilnika su:

- a) PBO-1 obrazac zahtjeva za određivanje ili promjenu biračke opcije raseljenog lica;
- b) PBO-2 obrazac zahtjeva za promjenu biračke opcije za birače koji su glasali izvan BiH;
- c) PRP-1 obrazac prijave za državljane BiH koji se prvi put prijavljuju za glasanje izvan BiH;
- d) PRP-2 obrazac potvrde prijave za državljane BiH koji su ranije bili upisani u izvod iz Centralnog biračkog spiska za glasanje izvan BiH;
- e) PBD-1 obrazac zahtjeva za određivanje biračke opcije za birače iz Brčko Distrikta BiH;
- f) obrasci izgleda privremenog izvoda iz Centralnog biračkog spiska i
- g) obrasci izgleda konačnog izvoda iz Centralnog biračkog spiska.

Član 54.
(Stupanje na snagu i objavljivanje u službenim glasilima)

Ovaj pravilnik stupa na snagu narednog dana od dana objavljivanja u "Službenom glasniku BiH", a objavit će se u „Službenim novinama FBiH“, „Službenom glasniku RS“, „Službenim novinama Brčko Distrikta BiH“ i web stranici Centralne izborne komisije BiH www.izbori.ba.

Broj: 05-1-2-02-2143 /10
Sarajevo, 29.04.2010. godine

Predsjednica

Ena Hadžiabdić

